

Capsidae duae (Hemiptera-Heteroptera) e Corea.

Descriptae ab

O. M. Reuter (Helsingfors).

1. *Adelphocoris funebris*, n. sp.

Niger, capite thoraceque glabris, nitidis, scutello hemielytrisque fumato-nigris, opaculis, tenuiter pallide aureo-pubescentibus, ventre, segmento genitali maris excepto, opaculo, parcius flavo-pubescente; pronoto parte apicali paullo pone callos extensâ limboque basali, apice scutelli, fasciâ obliquâ cunei externe usque ad basin extensâ, annulo lato articuli antennarum secundi paullo ante basin posito et medium subattingente, fere tertiâ basali parte articuli tertii quartâque articuli ultimi nec non maculâ obsoletâ anteapicali superiore femorum posticorum, tibiis et tarsis eburneis, illis apice, his apice articuli ultimi nigris; areâ orificiorum metastethii albâ; antennis articulo primo capiti ab antico viso aequae longo, tertio margini basali pronoti longitudine aequali. Long. ♂ 9 mm.

Habitat ad flumen Jálu, dom. V. I. Komarov; communic. dom. B. Jakovlev.

A. triannulato Stål nonnihil similis, antennis longioribus praecipue articulo secundo longiore, tertio hoc solum $\frac{1}{6}$ brevior, pronoto apice eburneo, ab *A. funesto* Reut. articulis antennarum ultimis crassis, tertio secundo aequae crasso divergens. Caput basi pronoti saltem $\frac{3}{5}$ angustius, ab antico visum latitudini frontis oculique unici aequae longum, a latere visum altitudine saltem $\frac{1}{3}$ brevis, clypeo leviter prominente, basi a fronte leviter discreto, genis (♂) humilibus, vertice maris oculo vix magis quam $\frac{1}{4}$ latiore. Rostrum nigro-piceum, basin coxarum intermediarum paullo superans. Antennae corpore cum hemielytris paullo breviores, articulo secundo primo circiter duplo et dimidio longiore, tertio secundo circiter $\frac{1}{6}$, quarto tertio fere $\frac{1}{3}$ brevior. Pronotum latitudine basali fere $\frac{2}{5}$ brevius, apice quam basi fere triplo angustius, disco versus apicem sat declivi, nitido, sublaevi. Hemielytra maris abdomen longe superantia. Tibiae nigro-spinulosae, spinulis crassitiei tibiarum aequae longis.